

**REGIONAL NEWS BULLETIN
HEADLINES (EVENING)**

Date – 08/12/2024

Time - 18:30 Hrs

1. Mizoram state human rights commission dinna atana inpuahchahna kal mek thla hnih dawn a tling tawh chungin engmah tihfel a la awm lo.
2. Mizoram sorkarin kumin September ni 1 atanga November thla thleng khan cess atangin cheng nuai 442, sing 9, sang 8 leh 664 hmuh a ni tawh.
3. Kar kalta Thawhlejni atanga tan Presbyterian kohhran thuneitu sang ber Synod inkhawmpui chu zanin hian a tiak dawn.
4. Prime Minister Narendra Modi-a'n hmarchhak biala hmasawna nasa tak awm chho chu lawmawm a tih thu a sawi.

<><><>

SHRC

Mizoram state human rights commission dinna atana inpuahchahna kal mek thla hnih dawn a tling tawh chungin engmah tihfel a la awm lo.

Sorkar official-te hnen atanga thudawn danin state human rights commission (SHRC) dinna tur atan hian October ni 11 khan hriattirna chhuah a ni a. Chutah chuan Protection of Human Rights Act, 1993 section 21 tlawhchhanin Mizoram larsap chuan SHRC hi a din a ni tiin ziahlan a ni a. Chutih lai chuan chairman leh member 2 turte ruat an la ni lo mai ni lovin a zawn hna thawh mek a ni a. A zawngtu committee hian a hmuh chuan sorkar pawmpui turin rawtna a thehltu dawn a. Commission a thawk tur dang mi 13 lak phalna hi sorkarin a pe tawh chungin lak fel a la ni lo bawk a. Official-te chuan he'ng la tihfel lohte hi bawhzui zel a nih thu an sawi a ni. SHRC hi din tura na taka nawr a nih hnu-ah pawh Mizoram sorkarin a din lawk loh avangin Gauhati High Court chuan kumin September ni 6 khan thla 2 chhunga din ngei turin thupek a siam tawh a. Chief Justice Vijay Bishnoi leh Justice Michael Zothankhuma te thutna division bench chuan thla 2 chhunga din a nih loh chuan sorkar chu na taka hrem a nih tur thu a lo puang tawh a ni.

SHRC din ngei tura nawrna atan Zofa Welfare Organization (ZWO) chuan an president Rev. Robawia hmingin kum 2021 khan High Court-ah an lo thlen tawh a. Chumi kal zelah chuan SHRC din tur hian High Court hian sorkar chu thu a pe ta a ni.

<><><>

CHILI

Champhai District-a Khuangthing khawmite chuan an hmarcha thar hmasak cheng nuai 60 hu an hralh tawh a, kg. khatah cheng 400 leh 415 inkarin an hralh a ni.

Khuangthing VCP Pu Zothanpuia hnen atanga thu dawn danin, thingtlang loneitute'n kumin November leh December thla chawhma lam thleng a Hmarcha an thar hmasak atangin Cheng nuai 60 chuang an lei tawh a. Hmarchate hi an khaw kawthler remchang lai leh khelmual ah te ni 3/4 te phovin, a ro hnuah a that dan a zirin Kg. khat Rs. 400 atanga Rs. 415 thlengin an hralh a. Kumin Krismas leh Kumthar 2025 inkarah hmarcha te hi a thawh hnihna atan an lo leh ang a. A thawh khatna ai chuan hmarcha hi a an thar hlawk zawk turah an inbeisei a. Kuminah cheng nuai 200 chuang man hmarcha tharchhuah theih an inbeisei a ni.

Khuangthing khawtlang hian nikum 2023 khan hmarcha an hralhna atangin Cheng Nuai 120 chuang an lo hmu tawh a, kuminah hian kum kalta ai chuan thar tam zawk an in beisei a, an hmarcha thar chhuahte hi Mizoram State pawn atanga sumdawng lokalte'n an lei sak thin a ni.

Khuangthing kuaah hian In dinglai 370 awmin, Tlangram lo nei thin hi Kum tin chhungkua 270 atanga 280 an ni thin a. Nakkum 2025 a thingtlang lo neih tum a Lo number pawt pawh chhungkaw 300 an tling tawh a ni.

<><><>

CESS

Mizoram sorkarin kumin September ni 1 atanga petrol leh diesel man atanga chhiah a tihpun atangin, November thla thleng khan road maintenance cess leh social infrastructure & services cess atangin cheng nuai 442, sing 9, sang 8 leh 664 hmuh a ni tawh.

Taxation finance department chuan August ni 30-a hriattirna a tihchhuahah petrol leh diesel-ah litre khat zelah social infrastructure & Services leh kawngpui

enkawlina atan cess cheng 2 ve ve lak a nih tur thu a chhuah atangin chhiah hi lak tan a ni a. October thla khan cheng nuai 16, sing 4, sang 8 leh 352 hmuh a ni a. November thla bik ah cheng nuai 426, sing 5 leh 312 a ni a. November-a chhiah (cess) lut a tam nachhan hi October thla khan khawl lamah fel lo a awm avangin petrol dealer-te'n pawisa an thun theih loh avang a nih thu Taxation Finance Department lam hotute chuan an sawi a ni.

Sorkar chuan Road Maintenance cess chu kawng enkawlina atan liau liau a nih tur thu an lo sawi tawh a, social infrastructure & services cess chu zirna in tihchangtlunna atan te, hriselna kaihhnawiha hman atan te, skill development leh hmeichhia te chawikanna (women empowerment) atana hman tur a nih thu an sawi a ni.

<><><>

VEHICLES

Mizoramah November ni 30 thleng khan lirthei inziaklut nuai 3, sing 2, sang 3 leh 83 a awm.

Lirthei inziaklut zingah hian lirthei ke pahnih nei tam berin nuai 2, sing 2, sang 2 leh 23 a awm a, car 53,699 in a tam lamah dawtin, bungraw phur chi 23,096 inziaklut an awm bawk a ni. Transport Department in a tarlan danin Mizoram chhunga taxi tlan mek 5,856 awmin, Two wheeler taxi 4,126 leh kar kawnga zin chi maxi cab 2,390 inziaklut an awm a ni. Nikum 2023 leh kumin November chhung khan lirthei inziaklut zat hi 40,063 in a pung a ni.

<><><>

SYNOD

Kar kalta Thawhlehi atanga tan Presbyterian kohhran thuneitu sang ber Synod inkhawmpui chu zanin hian a tiak dawn.

Vawiin chawhma ah Pastor nemngheh leh Pro. Pastor ruat pualin inkhawm a ni a. Chawhnu chu Lalpa Zanriah Sakramen inkhawm a ni a, zan Inkhawmah Moderator valedictory sermon ngaihthlak a ni ang. Synod inkhawmpui-ah hian Nilaini atang khan palaite'n rorel tanin nimin khan rorel hi zawh fel a ni a. An thurel zingah hian Aizawl Hmarchhak Presbytery atanga lut leh Synod Executive Committee lo rel tawh 'Synod hnuaia thawktute'n fa an neih avanga chawlh an lak theih chhung tihpun' rawtna chu sawi kawp a ni a. SEC atanga rawtna angin maternity leave hi ni 180 ni tawh se tiin 2025 atanga hman tan tura rem tih a ni. Chhimchhak Presbytery thu, 'Ruihhlo tive lote ven kawnga hmalak' rawtna chu tha tih a ni a, SEC bawh zui tura tih a ni. 'Uchuak taka taksa pholan a reh theih nana hmalak', Tuichang Presbytery rawtna chu mahni Kohhranah theuh hmalak ni se, tih a ni bawk. 'Sunday School kaikim chawimawina siam belh' rawtna Tuivawl Presbytery atanga lut chu tha tih a ni a, SEC bawh zui tura dah a ni a. Aizawl Chhimthlang Presbytery atanga lut, 'Naupangte thuawih zirtir' chungchang chu SEC lo bawh zui atana tih a ni bawk.

Hei bakah hian Council of Churches in Mizoram puala Special Sunday siam rawtna chu an rawtna angin October thla Pathianni vawi 4-na chu rem tih a ni a. Presbyterian English School (PES) tha zawka enkawl dan tur chungchanga rawtna chu tha tih a ni a. SEC-in lo bawh zui se, Synod-ah rawn thlen leh rawh se, tih a ni. Central KTP Leader thar atan Rev. H. Lalawmpuia, Sakawrtuichhun an thlan chu pawm a ni a. 'Cancer Hospital Chaplain Quarters neih' rawtna Aizawl Hmarchhak atanga lut chu hmalak mekna a ni e, ti a inhrilhfiah a ni. Mizoram Kraws Lian Synod Budget-a dah chungchang SEC atanga lut chu tha tih a ni a, Finance lam bawh zui tura tih a ni.

Kum 2023 - 2024 a kohhran dinhmun report a a lan danin Presbyterian Kohhranah hian Presbytery 47, Pastor Bial 304 leh tualchhung kohhran 1,160 a awm a. Minister 603 awm in, Kohhran Upa 5,963 niin Kohhran member hi nuai 6, sing 3, sang 9 leh 289 an ni a. Kohhran member nuai 3, sang 9 leh 56 hi mipa niin nuai 3, sing 3 leh 233 hi hmeichhia an ni.

<><><>

IKK ASSEMBLY

Ningani kalta a tanga tan Isua Krista Kohhran (Kross Var) Assembly inkhawmpui vawi - 57 na chu Dec 5-8 chhung hian Kawrtethawveng Kohhranin a thleng.

Assembly inkhawmpui vawi - 57 na hi kar kal ta Ningani khan tan a ni a, nimin thleng khan rorel inkhawm atan hun hman niin thurel langsar zingah Mission rawngbawlina lamah Odisha, Chhatisgarh leh Tripura Mission Field-ahte a ngeth lova thawktu kum 2025 chhungin lak leh ni rawh se, Odisha leh Tripura Mission Field-a Pathian Biakin tihchangtlun nise, kum 2025 chhungin Bial tinah Bial huap Revival

Grusade neih nise tihte bakah Kohhran lian thlan bik te'n Ministry Partner neiin Kohhran te zawkte khaichhuah hna thawk tur hmalak nise atel ani.

<><><>

PM LAUDS

Prime Minister Narendra Modi-a'n inkalpawhna, tunlai thiamna leh hmasawna ruhrel tha chho zel avanga hmarchhak state-a hmasawna nasa tak a awm chho chu lawmawm a tih thu a sawi. Viksit Bharat tana hmar chhak bial pawimawhzia chungchanga Union Minister, Jyotiraditya Scindia thu ziah, social media 'X'-a a dah chhawn-ah Prime Minister hian he thu hi a tarlang a, hmarchhak bial puala Ashtalakshmi Mahotsav buatsaih a ni chu lawmawm a tih thu a sawi bawk.

Ni 3 awh Ashtalakshmi Mahotsav hi New Delhi-ah neih a ni a, hmar chhak state 8, Assam, Arunachal Pradesh, Meghalaya, Manipur, Nagaland, Mizoram, Tripura leh Sikkim mawina leh hlutna tihlarna tura buatsaih a ni.

<><><>

SYRIA UNREST

Syria sorkar dotu pawl sipaiten sorkar sipai atanga dodalna engmah awm lovin wawiin khan an ram khawpui Damascus an la a, hetih lai hian kum 24 chhung rorel tawh an President, Bashar al-Assad-a chuan Syria a chhuahsan tawh nia sawi a ni.

Syria thuthar thehdarhtute sawi danin, Prime Minister Mohammad Ghazi al-Jalali-a chuan opposition sipaite kuta thuneihna hlan turin a inpeih tih a sawi. Damascus khawpui an lak hnuah eptu pawlte hian Assad-a rorelna chu a tih tawp a nih tak thu leh Syria tan hun thar a intan tak thu an puang a ni. Eptu sipaite hian Damascus hmar lam, Saydnaya sipai tan in-a tangte an chhuah tawh thu leh Homs khawpui pawh an thuhnuaia a awm tawh thu an puang bawk.

<><><>